



Trais deputads da la pld ed ina deputada da la pps en direcziun Rondo: Werner Natter, Duosch Fadri Felix, Peter Giacomelli e Valérie Favre Accola (da san.).



Giuvens deputads da la pcd: Reto Cramer, Roman Cantieni e René Epp (da san.).



Fan part da la fracziun da la pcd: Gaby Ulber, Silvia Casutt e Cornelia Märchy (da san.).



Cusseglia governativ Marcus Caduff è pront per la sessiun.



Maurus Tomaschett, il deputà da Breil.



Cusseglia governativ Jon Domenic Parolini (a san.) salida dus policists.

FOTOS G. N. STGIER

# «Per il lieu è quai in'onur»

## Puntraschigna: Avertura da la sessiun extra muros

DA GION NUTEGN STGIER / ANR

■ **Cun in bainvegni da las autoritads politicas da Puntraschigna ha cumenzà ier la sessiun extra muros dal cussegl grond. Fin venderdi è il parlament giast en la vischnanca da l'Engiadina Ota.** Puntraschigna è in lieu che sa chat-ta en il territori dal Bernina. Situada è la vischnanca sin 1805 meters sur mar. Enconuschent è il lieu turistic er pervia da las bellas chasas engiadinais e lura er cun avair hotels da la «belle époque», sco per exempel il Kronenhof, ina chasa da tschintg stailas. Puntraschigna è er ina vischnanca da guids da muntogna, cun schizunt in'atgna scola per guids da muntogna. Il lieu, a l'ur da San Murezzan, stat finanzialmain bain e quai è er la raschun che la vischnanca da Puntraschigna ha cun 85% in bass pe da taglia. La vischnanca ha in preventiv da 29 milliuns francs cun entradas da taglia per ina summa da radund 15 milliuns francs. *Martin Aebli*, il president communal da Puntraschigna e deputà da la pbd, ha ditg che

da cumenzar la stagiun da stad cun la sessiun extra muros dal cussegl grond saja bain insatge singular. Per Puntraschigna saja quai ina grond'onur da pudair dar albiert a la regenza, als deputads ed a las deputadas ed er als blers schurnalists. L'antieriur president dal cussegl grond ha er ditg che d'avair per quatter dis il parlament a Puntraschigna fetschia grond plashair. Cun rapportar ils meds da massa mintga di direct da Puntraschigna, scriver artitgels da la sessiun e mussar intgins maletgs saja la sessiun er ina buna reclama per il lieu. D'avair il parlament chantunal en vischnanca saja er fitg bun per l'image da Puntraschigna, ha punctuà Aebli.

### Per quatter dis in'otra musica

Debattà vegn anc fin venderdi en la sala gronda dal center da congress Rondo a Puntraschigna. En quella sala hajan adina puspè lieu radunanzas da manaschis pli gronds sco la Repower e la Viafier retica, ha menziunà il president communal

da Puntraschigna. La sala saja pero er savens lieu per concerts da tut gener, ha ditg Aebli. Ussa damai èn sut tetg en quel local ils 120 deputads e deputadas ed ils tschintg commembers da la regenza. Quai vul dir che per intgins dis vegn fatg in'otra musica en il Rondo a Puntraschigna.

### Segirezza en ed eturn il Rondo

Intgins turists che giran tras Puntraschigna e na san betg ch'il parlament grischun è per quatter dis en vischnanca sa dumondan pertge che varsaquants policists èn avant il center da congress ed er en l'intern da quel. En egl crodan lura er ils blers umens vestgids en nair ed er quai para als turists in pau misterius. Intgins han schizunt manegjà che blers da quels gijajan eventualmain ad in funeral cun esser la baselgia da Puntraschigna gist visavi al center da congress. Cun discurre cun in u l'auter dals deputads e da las deputadas è lura il misteri da la sessiun extra muros vegn al cler er per ils turists.



È vidlonder da scriver in pled per la sessiun: Kevin Brunold, il deputà sursilvan.



La sala dal center da congress è vegnida transformada en in local per il parlament grischun.